

神異典第四十九卷

神廟部彙考一

史記封禪書 西時 鄜時

秦襄公既侯居西垂自以爲主少皞之神作西時祀白帝其後十六年秦文公東獵汧渭之間下居之而吉文公夢黃虵自天下屬地其口止於鄜衍文公問史敦敦曰此上帝之徵君其祠之於是作鄜時用三牲郊祭白帝焉自未作鄜時也而雍旁故有吳陽武時雍東有好時皆廢無祠或曰自古以雍州積高神明之隩故立時郊上帝諸神祠皆聚云蓋黃帝時嘗用事雖晚周亦郊焉其語不經見縉紳者不道

陳寶祠

作鄜時後九年文公獲若石云于陳倉北阪城祠之其神或歲不至或歲數來來也常以夜光輝若流星從東南來集于祠城則若雄雞其聲殷云野雞夜雉以一牢祠命曰陳寶

注正義曰三秦記

云寶雞神祠在漢陳倉縣故城中今陳倉縣東石雞在陳倉山上祠在陳倉城故言獲若石于陳

倉北阪城祠之瓚曰陳倉縣有寶夫人祠或一歲二歲與葉君合葉神來時天爲之殷殷雷鳴雉爲雊在長安正西五百里索隱曰列異傳云陳倉人得異物以獻之道遇二童子云此名爲媚在地下食死人腦媚乃言彼二童子名陳寶得雄者王得雌者霸乃逐童子化爲雉秦穆公大獵果獲其雌爲立祠祭有光雷電之聲雄止南陽有赤光長十餘丈來入陳倉祠中所以代俗謂之寶夫人祠抑有由也

伏祠 密時 上時 下時 畦時

作鄜時後七十八年秦德公旣立卜居雍後子孫飲馬於河遂都雍雍之諸祠自此興用三百牢于鄜時作伏祠其後六年秦宣公作密時于渭南祭青帝其後百餘年秦靈公作吳陽上時祭黃帝作下時祭炎帝櫟陽雨金秦獻公自以爲得金瑞故作畦時櫟陽而祀白帝

諸神祠

秦并天下雍有日月參辰南北斗熒惑太白歲星填星二十八宿風伯雨師四海九臣十四臣諸布諸嚴諸逖之屬百有餘廟西亦有數十祠于湖有周天子祠于下邽有天神灋鑄有昭明天子辟池

于社稷有三社主之神壽星祠而雍管廟亦有社主社主故周之右將軍其在秦中最小鬼之神者各以歲時奉祠唯雍四時上帝爲尊其光景動人民唯陳寶

黑帝祠 蚩尤祠 靈星祠

高祖初立爲漢王二年東擊項籍而還入關聞故秦時上帝祠何帝也對曰四帝有白青黃赤帝之祠高祖曰吾聞天有五帝而有四何也莫知其說於是高祖曰吾知之矣乃待我而具五也乃立黑帝祠命曰北時後四歲天下已定令祝官立蚩尤之祠於長安其後二歲或曰周興而邑郃立后稷之祠至今血食天下於是高祖制詔御史其令郡國縣立靈星祠

注

廟記云靈星祠在長安城東

十里

五帝廟

文帝時趙人新垣平以望氣見上言長安東北有神氣成五采若人冠纓焉或曰東北神明之會西方神明之臺也天瑞下宜立祠上帝以合符應于是作渭陽五帝廟同宇帝一殿面各五門各如其帝色祠所用及儀亦如雍五時五帝廟南臨渭北穿蒲池溝水權火舉而祠若光輝然屬天焉

長安太一祠

今上卽位毫人謬忌奏祠太一方曰天神貴者太一太一佐曰五帝古者天子以春秋祭太一東南郊用太牢七日爲壇開八通之鬼道于是天子令太祝立其祠長安東南郊常奉祠如忌方

壽宮

天子病鼎湖甚巫醫無所不致不愈游水發根言上郡有巫病而鬼神下之上召置祠之甘泉及病使人問神君神君言曰天子無憂病病少愈彊與我會甘泉于是病愈遂起幸甘泉病良已大赦置酒壽宮神君又置壽宮北宮張羽旗設供具以禮神君

按漢書郊祀志注壽宮奉神之宮也

后土祠

天子郊雍議曰今上帝朕親郊而后土無祀則禮不答也有司與太史公祠官寬舒議天地牲角饗栗今陛下親祠后土后土宜于澤中圓丘爲五壇壇一黃犢太牢具已祠盡瘞而從祠衣上黃於是天子遂東始立后土祠汾陰睢丘如寬舒等議上親望拜如上帝禮

甘泉太一祠

上幸雍且郊或曰五帝太一之佐也宜立太一而上親郊之上遂幸甘泉令祠官寬舒等具太一祠壇祠壇放薄忌太一壇壇三垓五帝壇環居其下各如其方

漢書郊祀志 諸神祠

宣帝時南郡獲白虎獻其皮牙爪上爲立祠又以方士言爲隨侯劍寶玉寶璧周康寶鼎立四祠於未央宮中又立歲星辰星太白熒惑南斗祠於長安城旁京師近縣鄠則有勞谷五牀山日月五帝仙人玉女祠雲陽有徑路神祠祭休屠王也又立五龍山仙人祠及黃帝天神帝原水凡四祠于膚施 成帝初卽位丞相衡御史大夫譚奏甘泉泰畤河東后土之祠宜可徙置長安定南北郊爲萬世基天子從之既定衡又言王者各以其禮制事天地非因異世所立而繼之今雍鄠密上下時本秦侯各以其意所立非禮之所載術也漢興之初儀制未及定卽且因秦故祠復立北時今旣稽古建定天地之大禮郊見上帝青赤白黃黑五方之帝皆畢陳各有位饌祭祀備具諸侯所妄造王者不當長遵及北時未定時所立不宜復修天子皆從焉及陳寶祠由是皆罷明年衡譚復條奏長安廚官縣官給祠郡國侯神方士使者所祠凡六百八十三所其二百八所應禮及疑無明文可奉

祠如故其餘四百七十五所不應禮或復重請皆罷奏可本雍舊祠二百三所唯山川諸星十五所爲應禮云若諸布諸嚴諸逐皆罷社主有五祠置其一又罷高祖所立梁晉秦荆巫九天南山萊中之屬及孝文渭陽孝武薄忌太一三一黃帝冥羊馬行泰一臯山山君武夷夏后啟母石萬里沙八神延年之屬及孝宣參山蓬山之眾成山萊山四時蚩尤勞谷五牀仙人玉女徑路黃帝天神原水之屬皆罷明年匡衡坐事免官爵衆庶多言不當變動祭祀者又初罷甘泉泰畤作南郊日大風壇甘泉竹宮折拔時中樹木十圍以上百餘天子異之以問劉向對曰家人尙不欲絕種祠況於國之神寶舊時且甘泉汾陰及雍五畤始立皆有神祇感應然後營之非苟而已也武宣之世奉此三神禮敬勅備神光尤著祖宗所立神祇舊位誠未易動及陳寶祠自秦文公至今七百有餘歲矣漢興世世常來光色赤黃長四五丈直祠而息音聲砰隱野雞皆雊每見雍太祝祠以太牢遣候者乘傳馳詣行在所以爲福祥高祖之時五來文帝二十六來武帝七十五來宣帝二十五來初元元年以來亦二十來此陽氣舊祠也及漢宗廟之禮不得擅議皆祖宗之君與賢臣所共定古今異制經無明文至尊至重難以疑說正也前始納貢禹之議後人相因多所動搖易大傳曰誣神者殃及三世

恐其咎不獨止禹等上意恨之後上以無繼嗣故令皇太后詔有司曰蓋聞王者承事天地交接事一尊莫著於祭祀孝武皇帝大聖通明始建上下之祀營泰時於甘泉定后土於汾陰而神祇安之饗國長久子孫蕃滋累世遵業福流於今今皇帝寬仁孝順奉循聖緒靡有大愆而久無繼嗣思其咎職殆在徙南北郊違先帝之制改神祇舊位失天地之心以妨繼嗣之福春秋大復古善順祀其復甘泉泰時汾陰后土如故及雍五時陳寶祠在陳倉者又復長安雍及郡國祠著明者且半後成帝崩皇太后詔有司曰皇帝卽位思順天心遵經義定郊禮天下說憲懼未有皇孫故復甘泉泰時汾陰后土庶幾獲福皇帝恨難之卒未得其祐其復南北郊長安如故以順皇帝之意也哀帝卽位寢疾博徵方術士京師諸縣皆有侍祠使者盡復前世所常興諸神祠官凡七百餘所一歲三萬七千祠云明年復令太皇太后詔有司曰皇帝孝順奉承聖業靡有解怠而久疾未瘳夙夜惟思殆繼體之君不宜改作其復甘泉泰時汾陰后土祠如故後平帝元始五年大司馬王莽奏復長安南北郊如故三十餘年間天地之祠五徙焉後莽又奏言易曰方以類聚物以羣分分羣神以類相從爲五部兆天墜之別神中央帝黃靈后土時及日廟北辰北斗填星中宿中宮于長安城之未墜兆東

方帝太昊青靈勾芒時及雷公風伯廟歲星東宿東宮于東郊北南方炎帝赤靈祝融時及熒惑星南宿南宮于南郊兆西方帝少皞白靈蓐收時及太白星西宿西宮于西郊兆北方帝顓頊黑靈元冥時及月廟雨師廟辰星北宿北宮于北郊兆奏可于是長安旁諸廟兆時甚盛矣

述異記 望陵祠

會稽山有虞舜巡狩臺臺下有望陵祠帝舜南巡葬于九疑民思之立祠曰望陵祠

蚩尤祠

太原村落間祭蚩尤神不用牛頭今冀州有蚩尤川卽涿鹿之野漢武時太原有蚩尤神晝見龜足蚩首其俗遂爲立祠

義陽神廟

晉末羣盜蜂起義陽公主自洛中奔出至洛南士卒二千餘人留守不去以衛京師劉曜攻破之主有殊色曜將逼之主手刃曜不中遂自刃曜奇其正節遣葬之民憐之爲立廟今義陽神是也

董家祠

廬陵郡有董氏之宅前有董家祠昔有董氏語其鄉人曰吾嘗盡室作神及死家人老幼皆卒鄉人往往見之稱吾於地下作廬陵侯鄉人因爲立祠能致風雨

唐書禮樂志 太公尙父廟

開元十九年始置太公尙父廟以留侯張良配中春中秋上戊祭之牲樂之制如文宣出師命將發日引辭于廟仍以古名將十人爲十哲配享天寶六載詔諸州武舉人上省先謁太公廟乾元元年太常少卿于休烈奏秋享漢祖廟旁無侍臣而太公乃以張良配子房生漢初佐高祖定天下時不與太公接古配食廟庭皆其佐命太公人臣也誼無配享請以張良配漢祖廟上元元年尊太公爲武成王祭典與文宣王比以歷代良將爲十哲象坐侍秦武安君白起漢淮陰侯韓信蜀丞相諸葛亮唐尙書右僕射衛國公李靖司空英國公李勣列於左漢太子少傅張良齊大司馬田穰苴吳將軍孫武魏西河守吳起燕昌國君樂毅列於右以良爲配後罷中祀遂不祭建中三年禮儀使顏真卿奏治武成廟請如月令春秋釋奠其追封以王宜用諸侯之數樂奏軒縣詔史館考定可配享者列古今名將凡六十四人圖形焉越相國范蠡齊將孫臏趙信平君廉頗秦將王翦漢相國平陽侯

曹參左丞相絳侯周勃前將軍北平太守李廣大司馬冠軍侯霍去病後漢太傅高密侯鄧禹左將軍膠東侯賈復執金吾雍奴侯寇恂伏波將軍新息侯馬援太尉槐里侯皇甫嵩魏征東將軍晉陽侯張遼蜀前將軍漢壽亭侯關羽吳偏將軍南郡太守周瑜丞相婁侯陸遜晉征南大將軍南城侯羊祜撫軍大將軍襄陽侯王濬東晉車騎將軍康樂公謝元前燕太宰錄尚書太原王慕容恪宋司空武陵公檀道濟梁太尉永寧郡公王僧辯北齊尚書右僕射燕郡公慕容紹宗周大冢宰齊王宇文憲隋上柱國新義公韓擒虎柱國太平公史萬歲唐右武侯大將軍鄂國公尉遲敬德右武衛大將軍邢國公蘇定方右武衛大將軍同中書門下平章事韓國公張仁亶兵部尚書同中書門下三品中山公王峻夏官尚書同中書門下三品朔方大總管王孝傑齊相管仲安平君田單趙馬服君趙奢大將軍武安君李牧漢梁王彭越太尉條侯周亞夫大將軍長平侯衛青後將軍營平侯趙充國後漢大司馬廣平侯吳漢征西大將軍夏陽侯馮異建威大將軍好畤侯耿弇太尉新豐侯段熲魏太尉鄧艾蜀車騎將軍西鄉侯張飛吳武威將軍南郡太守孱陵侯呂蒙大司馬荊州牧陸抗晉鎮南大將軍當陽侯杜預太尉長沙公陶侃前秦丞相王猛後魏太尉北平王長孫嵩宋征虜將軍

王鎮惡陳司空南平公吳明徹北齊右丞相咸陽王斛律光周太傅大宗伯燕國公子謹右僕射鄴國公韋孝寬隋司空尙書令越國公楊素右武侯大將軍宋國公賀若弼唐司空河間郡王孝恭禮部尙書開喜公裴行儉兵部尙書同中書門下三品代國公郭元振朔方節度使兼御史大夫張齊丘太尉中書令尙父汾陽郡王郭子儀貞元二年刑部尙書關播奏太公古稱大賢下乃置亞聖義有未安而仲尼十哲皆當時弟子今以異時名將列之弟子非類也請但用古今名將配享去亞聖十哲之名自是唯享武成王及留侯而諸將不復祭矣四年左司郎中嚴浣等議曰貞觀中以太公兵家者流始令礪溪立廟開元漸著上戊釋奠禮其進不薄矣上元之際執事者苟意於兵遂封王爵號擬文宣彼於聖人非倫也謂宜去武成王號復爲太公廟左領軍大將軍令狐建等二十四人議曰兵革未靖宜右武以起忠烈今特貶損非勸也且追王爵以時祠爲武教主文武並宗典禮已久改之非也乃詔以將軍爲獻官自是以上將軍大將軍將軍將軍爲三獻 又按宋史禮志昭烈武成王自唐立太公廟春秋仲月上戊日行祭禮上元初封爲武成王始置亞聖十哲等後又加七十二弟子梁廩從祀之祭後唐復之太祖建隆三年詔修武成王廟與國學相對命左諫議大夫崔

頌董其役仍令頌檢閱唐末以來謀臣名將勲績尤著者以開四年四月帝幸廟歷觀圖壁指白起曰此人殺已降不武之甚何受享于此命去之景德四年詔西京擇地建廟如東京制大中祥符元年加諡昭烈初建隆議升歷代功臣二十三人舊配享者退二十二人慶曆議自管仲張良而下依舊配享不用建隆升降之次乾道六年詔武成王廟升李晟于堂上降李勣于李晟位次仍以曹彬從祀併詔有司討論歷代諸將爲之去取然後與本朝名將繪于殿廡 又按冊府元龜開元十九年四月壬辰兩京及天下諸州各置太公廟一所制曰乾坤冲用陰陽所以運行帝王大業文武所以垂範故四序在乎平分五材資于並用式稽乾坤之意載明文武之道永言舊章斯典未洽自我而始爰備闕文昔羲皇立弧矢之象黃帝有甲兵之事將以定禍亂濟生靈分二柄而齊設配兩儀而共久至若用之以仁義行之以禮樂龍豹卷舒而莫測星辰應變而無方誰其尸之則齊太公之道也故宣尼大聖立文以化成尙父惟師仗武而弘訓齊魯之道列親賢之教興鬱爲政源崇我王業遂使金石之奏永播于蹲龍之庭蒸嘗之享不行于非熊之室文武並設斯不然矣豈王風云季禮沒于前修將帥是尊慶彰于今日式崇大典垂裕後昆宜令兩

及天下諸州各置太公尙父廟一所以張良配享哀宗天祐二年九月中書門下奏伏自遷都已來武成王廟並未置立今請改爲武明王其廟請于街西選地建立其餘修置及配享十哲七十二弟子並請准故事者從之

錄異記 廬山九天使者廟

廬山九天使者開元中皇帝夢神仙羽衛千乘萬騎集于空中有一人朱衣金冠乘車而下謁帝曰我九天採訪巡糾人間欲於廬山西北置一下宮自有木石基址但須工力而已帝卽遣中使詣山西北果有基跡宛然信宿有巨木數千段自然而至非人力所運堂殿廊宇隨類致木皆得足用或云此木昔九江王所採擬作宮殿沉在江州湓浦至是神人運來以供所用廟西長廊柱礎架虛在巨澗之上其下汨流奔響泓窅不測久歷年歲曾無危墊初構廟時材木自至一夕巨萬皆有水痕門殿廊宇之基自然化出非人版築常有五色神光照燭廟所常如晝日揮斤運工略無餘暇人力忘倦旬月告成畢工之際中使夢神人曰赭墜丹綠廟北地中尋之自得勿須遠求於是訪之採以充用略無所闕旣而建昌渡有靈宮五百餘人若衣道士服者皆言詣使者廟今圖像存焉初元宗

夢神人曰因召天台鍊師司馬承禎以訪其事承禎奏曰今名山嶽瀆血食之神以主祭祠太上慮其妄有威福以害烝黎分命上真監蒞川嶽有五嶽真君焉又青城丈人爲五嶽之長潯山九天司命主九天生籍廬山九天使者執三天之錄彈糾萬神皆爲五嶽上司蓋各置廟以齋食爲饗是歲五嶽三山各置廟焉

宋史禮志 火神廟

禮官議關伯爲高辛火正實居商丘主祀大火後世因之祀爲貴神祖宗以來郊祀上帝而大辰已在從祀關伯之廟每因赦文及春秋委京司長吏致奠咸秩之典未始云闕然國家有天下之號實本於宋五運之次又感火德宜因興王之地商丘之舊爲壇兆祀大火以關伯配建中靖國元年又建陽德觀以祀熒惑因翰林學士張康國言天下崇靈觀並建火德真君殿仍詔正殿以離明爲名有司請以關伯從祀離明殿又請增關伯位乾道五年太常少卿林栗等言國朝以宋建號以火紀德推原發祥之所自崇建商丘之祠府曰應天廟曰光德加封王爵錫謚宣明所以追嚴者備矣

諸神祠

諸祠廟自開寶皇祐以來凡天下名在地志功及生民宮觀陵廟名山大川能興雲雨者並加崇飾
增入祀典熙寧復詔應祠廟祈禱靈驗而未有爵號並以名聞于是太常博士王右請自今諸神祠
無爵號者賜廟額已賜額者加封爵初封侯再封公次封王生有爵位者從其本封婦人之神封夫
人再封妃其封號者初二字再加四字如此則錫命馭神恩禮有序欲更增神仙封號初真人次真
君大觀中尙書省言神祠加封爵等未有定制乃並給告賜額降勅已而詔開封府毀神祠一千二
十八區遷其像入寺觀及本廟仍禁軍民擅立大小祠祕書監何志同言諸州祠廟多有封爵未正
之處如屈原廟在歸州者封清烈公在潭州者封忠潔侯永康軍李冰廟已封廣濟王近乃封靈應
公如此之類皆未有祀典致前後差誤宜加稽考取一高爵爲定悉改正之他皆倣此故凡祠廟賜
額封號多在熙寧元祐崇寧宣和之時其新立廟若何承矩李允則守雄州曹瑋帥秦州李繼和節
度鎮戎軍則以有功一方者也韓琦在中山范仲淹在慶州孫冕在海州則以政有威惠者也王承
偉築祁州河堤工部員外郎張夏築錢塘江岸則以爲人除患者也封州曹觀德慶府趙師旦邕州
蘇緘恩州通判董元亨指揮使馬遂則死於亂賊者也若王韶於熙河李憲於蘭州劉滬於水洛城

郭成於懷慶軍折御卿於鳳州作坊使王吉於麟州神堂砦各以功業建廟寇準死雷州人憐其忠而趙普祠中山韓琦祠相州則以鄉里皆載祀典焉其他州縣獄瀆城隍仙佛山神龍神水泉江河之神及諸小祠皆由禱祈感應而封賜之多不能盡錄云

冊府元龜 終南山祠

開成二年四月辛酉詔曰每聞京師舊說以爲終南山興雲卽必有雨若當晴霧雖密雲他至竟不霽霽況茲山北面闕庭日當恩顧修其望祀寵數宜及今聞都無祠宇巖谷湫却在命祀終南山未備禮秩湫爲山屬捨大崇細深所謂闕於興雲致雨之祀宜令中書門下且差官設奠宣告恩禮便令擇立廟處所週日以聞然後命有司卽時建立八月乙未長安縣令杜慆奏准詔置終南山祠宇畢己酉冊終南山神爲廣惠公

入蜀記 巫山妙用真人祠

真人卽世所謂巫山神女也祠正對巫山峰巒上入霄漢山脚直插江中議者謂太華衡廬皆無此奇然十二峰者不可悉見所見八九峯惟神女峯最爲纖麗奇峭宜爲仙真所託祝史云每八月十